

法政大学学術機関リポジトリ

HOSEI UNIVERSITY REPOSITORY

PDF issue: 2025-05-09

0002引痘略(楚南家文書)

引痘略

南海邱熺浩川手輯

引痘說

痘何以曰牛也。痘之種自牛來也。外洋向無此疾。後由他處傳染。患亦滋多。惟畜牛取乳之家。獨不沾染。醫人欲窮其故。見牛乳傍有青痘小疱。形與痘主。因悟牛之患痘必輕。以

之傳人必然無害於是按古針刺法取牛痘之漿種人兩臂消燥清冷淵二穴旬日果於所刺之處隨出數顆按日灌水按日滿漿按日結痂落靨無一損傷無一復出蓋牛土畜也人之脾屬土以土引土同氣相感同類相生故能取效若此痘種自牛而來故曰牛痘也

其曰引何也曰痘之為毒受於先天感於時氣散於經絡男女交感之會先天胎毒既有淺深感時行之氣復有善惡而散於經絡分配五臟又有輕重正痘有發熱即現點者最險之症腎經之毒也由腎而肝而心而肺而脾傳經既多其症亦遞減故痘之發毒腎最重脾最輕按古痘苗塞鼻孔法亦必五臟傳

徧始能發熱緣鼻者肺之外竅也苗塞鼻中
其氣先傳於肺肺主皮毛肺傳於心心主血
脈心傳於脾脾主肌肉脾傳於肝肝主筋肝
傳於腎腎主骨痘毒藏骨髓之內感苗氣而
發其毒自骨髓盡達於筋腎藏之毒解矣自
筋盡達於肌肉肝藏之毒解矣自肌肉盡達
於血脈脾藏之毒解矣自血脈盡達於皮毛

心藏之毒解矣自皮毛盡達於顆粒肺藏之
毒解矣苗氣必歷五臟層遞而入內毒亦必
歷五臟層遞而出此傳送之次序也今種牛
痘法擇於兩臂中消燥清冷淵二穴上下交
連之處種之似與塞鼻孔法有異殊不知人
身兩臂乃手少陽三焦經也三焦者人身最
閑要之俯如天地之三元總領五臟六腑營

衛經絡通內外左右上下之氣三焦通則內外左右上下皆通得其閑要之處引之直從皮毛血脈肌肉筋絡同時直傳而入使縱有胎毒深藏於腎亦自然同時引絜而出如引路然引諸坦途則無顛躓之患如引絲然引其端緒則無棼亂之憂金鑑所謂引其毒於未發之先者即此意張遜玉種痘新書所謂

以佳苗而引胎毒斯毒不橫而症自順者亦此意故凡種痘皆用引法而引毒從皮毛血脈肌肉筋骨同時而出則牛痘為最捷也痘為小兒一大病當天行時人人尚思遠避今無故取嬰孫而與之以病可乎曰非也譬之捕盜乘其羽翼未成就而擒之甚易矣譬之去莠及其滋蔓未延蔓而除之甚易矣人

家小兒出痘如遇險症延醫服藥舉家日夕
守視多少酸辛問卜求神多少驚恐其輕者
亦須多方調護今牛痘則止種四顆或六顆
小兒嬉笑飲食一切如常旬日之外告厥成
功無災無害不惟小兒省却疾苦即育子者
亦省却憂勞法誠善也

或問種牛痘者有死者否曰斷無致死之理

予少時未出天花洋醫為予種時年三十二
歲今已十有三年矣經予手所種小兒不下
萬千皆根基長養以至娶妻生子不能悉數
即如南城賓谷曾大中丞年近六旬难于得
嗣前開藩吾粵時舉一子命予為種痘隨手
奏效蒙贈以勿藥有喜四字扁其^額他所種萬
無一失人所共知若非身試無誤敢以人為

戲乎

首在畱養苗漿

牛痘法全在養苗此苗始自外洋嗣後以人傳人貴乎連綿不絕予既於洋行會館設局夏月以八日為一期春秋冬三季以九日為一期周而復始來種者風雨勿改而洋行好善諸公復醵金生息自四月至九月來種者

酌以菓金與取漿之人其所以設菓金者蓋當盛夏溽暑之時即平日深信者亦多拘執而不肯來痘不種則漿無從取漿不取則苗無以繼今既設菓金俾來者孩童既獲安金而貧乏亦不無小補於是種痘者源々而來而佳苗乃綿々不絕行之既久人咸知牛痘之法雖盛暑亦無爽也

次在認識瘋疾

父母愛子之心人人皆同粵東地勢卑濕不
無瘋疾來求種痘者恐一同混雜誤取其漿
傳之無疾小兒為害不淺以此告知洋行諸
公呈請 有司派令養濟院認識瘋疾之人
具結存案逢期到局伺候凡來種者先令驗
過然後取苗自無貽誤

引泄法

其法不論春夏秋冬隨時皆可不揀天氣不
擇良辰不避風不禁忌不分男女不拘大小
自小兒生百日後但現在無瘡癩無癰癰無
胎毒及皮膚血熱疳積諸疾病便可隨時引
種

牛痘灌漿滿足總在八九日故種痘之期大

都以八九日為率

太早則漿無力遲則漿老無功

至期於

先一期所種漿水滿足之孩童擇其痘頂不尖脚不斜不皺不黃不暗不破要如紅線圍纏收束緊寔色若珍珠寶光者又察此童現在無瘡癩癰癰胎毒皮膚血熱疔積疾病等症者是謂佳苗若其痘色淡白暗而無寶光頂雖平而脚斜似鬆中央無一點焦硬者不

宜用

苗既佳矣取苗時用刀尖向其痘面四圍輕輕剔破將痘面中央一點焦破小靨微揭其漿清亮者可用若見漿水濁白或黃即使刀尖三兩次點去濁漿俟其流出清漿如圓珠一粒不流散者為貴好漿一粒可種數人種時孩童衣衫兩袖捲貼膊上用小繩二前